

চিন্তনামা

উৎসর্গ

মাতা বাসন্তী দেবীর শ্রীশ্রীচরণাবিন্দে—

নজরুল ইসলাম

অর্ঘ্য

হায় চির-ভোলা ! হিমালয় হতে
অমৃত আনিতে গিয়া
ফিরিয়া এলে যে নীলকণ্ঠের
মৃত্যু-গরল পিয়া !
কেন এত ভালোবেসেছিলে তুমি
এই ধরণীর ধূলি ?
দেবতারাই তাই দামামা বাজায়
স্বর্গে লইল তুলি !

হুগলি

৩রা আষাঢ় ১৩৩২

অকাল-সন্ধ্যা

[জয়-জয়ন্তী—কীর্তন]

খোলো মা দুয়ার খোলো ;
প্রভাতেই সন্ধ্যা হলো
দুপুরেই ডুবল দিবাকর গো ।
সমরে শয়ান ওই,
সুত তোর বিশ্বজয়ী,
কাঁদনের উঠছে তুফান-ঝড় গো॥

সবারে বিলায়ে সুধা,
সে নিল মৃত্যু-ক্ষুধা,
কুসুম ফেলে নিল খঞ্জর গো !

তাহারি অস্থি চিরে
 দেবতা বজ্র গড়ে
 নাশে ঐ অসুর অসুন্দর গো ॥

ঐ মা যায় সে হেসে,
 দেবতার উপরে সে,
 ধরা নয়, স্বর্গ তাহার ঘর গো ।
 যাও বীর যাও গো চলে
 চরণে মরণ দলে
 করুক প্রণাম বিশ্ব-চরাচর গো ॥

তোমার ঐ চিত্ত জ্বলে :
 ভাঙলে ঘুম ভাঙলে
 নিজে হয় নিবলে চিতার 'পর গো ।
 বেদনার শ্মশান-দহে
 পুড়ালে আপন দেহে,
 হেথা কি নাচবে না শঙ্কর গো ॥

আরিয়াদহ
 ৬ই আষাঢ় ১৩৩২

সান্ত্বনা

চিত্ত-কুঁড়ি-হাস্মা-হেনা মৃত্যু-সাঁঝে ফুটল গো !
 জীবন-বেড়ার আড়াল ছাপি বুকের সুবাস টুটল গো !
 এই তো কারার প্রাকার টুটে
 বন্দি এল বাইরে ছুটে,
 তাই তো নিখিল আকুল-হৃদয় শ্মশান-মাঝে জুটল গো !
 ভবন-ভাঙা আলোর শিখায় ভুবন বেঙে উঠল গো ।

২

স্ব-রাজ দলের চিত্ত-কমল লুটল বিশ্বরাজের পায়,
দলের চিত্ত উঠল ফুটে শতদলের শ্বেত আভায়।

রূপের কুমার আজকে দোলে

অরূপের ঐ শিশু-মহলে,

মৃত্যু-বাসুদেবের কোলে কারার কেশব ঐ গো যায়,
অনাগত বৃন্দাবনে মা যশোদা শাঁখ বাজায়।

৩

আজকে রাতে যে ঘুমুল, কালকে প্রাতে জাগবে সে।

এই বিদায়ের অন্ত-আঁধার উদয়-উষার রাঙবে রে!

শোকের নিশির শিশির ঝরে,

ফলবে ফসল ঘরে-ঘরে,

আবার শীতের রিক্ত শাখায় লাগবে ফুলের রাগ এসে।

যে মা সাঁঝে ঘুম পাড়াল, চুম দিয়ে ঘুম ভাঙবে সে।

৪

না ঝরলে তাঁর প্রাণ-সাগরে মৃত্যু-রাতের হিম-কণা

জীবন-শুক্তি ব্যর্থ হতো, মুক্তি-মুক্তা ফলত না।

নিখিল-আঁখির ঝিনুক-মাঝে

অশ্রু-মানিক ঝলত না যে!

রোদের উনুন না নিবিলে চাঁদের সুধা গলত না।

গগন-লোকে আকাশ-বধূর সন্ধ্যা-প্রদীপ জ্বলত না।

৫

মরা বাঁশে বাজবে বাঁশি, কাটুক না আজ কুঠার তায়,

এই বেণুতেই ব্রজের বাঁশি হয়তো বাজবে এই হেথায়।

হয়তো এবার মিলন-রাসে

বংশীধারী আসবে পাশে,

চিত্ত-চিতার ছাই মেখে শিব সৃষ্টি-বিষাণ ঐ বাজায়।

জন্ম নেবে মেহেদি-ঈসা ধরার বিপুল এই ব্যথায়।

৬

কৰ্মে যদি বিরাম না রয়, শান্তি তবে আসত না ;
 ফলবে ফসল—নইলে নিখিল নয়ন-নীরে ভাসত না !
 নেইকো দেহের খোসার মায়া,
 বীজ আনে তাই তরুর ছায়া ;
 আবার যদি না জন্মাত, মৃত্যুতে সে হাসত না ।
 আসবে আবার—নইলে ধরায় এমন ভালো বাসত না !

হুগলি

১৬ই আষাঢ় ১৩৩২

ইন্দ্র-পতন

তখনো অস্ত যায়নি সূর্য, সহসা হইল শুরু
 অম্বরে ঘন ডম্বরু-ধ্বনি গুরুগুরু গুরুগুরু !
 আকাশে আকাশে বাজিছে এ কোন ইন্দের আগমনী ?
 শুনি, অম্বুদ-কম্বু-নিনাদে ঘন বৃহিত-ধ্বনি ।
 বাজে চিক্কুর-হ্রেষা-হর্ষণ মেঘ-মন্দুরা-মাবে,
 সাজিল প্রথম আষাঢ় আজিকে প্রলয়ঙ্কর সাজে ।

ঘনায় অশ্রু-বাষ্প-কুহেলি ঈশান-দিগঙ্গনে,
 স্তব্ধ-বেদনা দিগ-বালিকারা কী যেন কাঁদনি শোনে !
 কাঁদিছে ধরার তরুলতা-পাতা, কাঁদিতেছে পশু-পাখি,
 ধরার ইন্দ্র স্বর্গে চলেছে ধূলির মহিমা মাখি ।
 বাজে আনন্দ-মৃদু গগনে, তড়িৎ-কুমারী নাচে,
 মর্ত-ইন্দ্র বসিবে গো আজ স্বর্গ-ইন্দ্র কাছে !
 সপ্ত-আকাশ-সপ্তস্বর হানে ঘন করতালি,
 কাঁদিছে ধরায় তাহারি প্রতিধ্বনি—খালি, সব খালি !

হায় অসহায় সর্বৎসহা মৌনা ধরণী মাতা,
 শুধু দেব-পূজা তবে কি মা তোর পুষ্প হরিৎ-পাতা ?
 তোর বুকে কি মা চির-অতৃপ্ত রবে সন্তান-ক্ষুধা ?

তোমার মাটির পাত্রে কি গো মা ধরে না অমৃত-সুধা
জীবন-সিন্ধু মথিয়া যে-কেহ আনিবে অমৃত-বারি,
অমৃত-অধিপ দেবতার রোষ পড়িবে কি শিরে তারি ?
হয়তো তাহাই, হয়তো নহে তা, —এটুকু জেনেছি খাটি,
তারে স্বর্গের আছে প্রয়োজন, যারে ভালোবাসে মাটি।

কাঁটার মৃণালে উঠেছিল ফুটে যে চিন্ত-শতদল,
শোভেছিল যাহে বাণী কমলার রক্ত-চরণ-তল,
সম্ভ্রমে-নত পূজারী মৃত্যু ছিড়িল সে-শতদলে—
শ্রেষ্ঠ অর্থ্য অর্পিবে বলি নারায়ণ-পদতলে !
জানি জানি মোরা, শঙ্খ-চক্র-গদা যাঁর হাতে শোভে—
পায়ের পদু হাতে উঠে তাঁর অমর হইয়া রবে।
কত সাস্ত্রনা-আশা-মরীচিকা কত বিশ্বাস-দিশা
শোক-সাহারায় দেখা দেয় আসি, মেটে না প্রাণের তৃষা !
দুলিছে বাসুকি মণিহার্য ফণি, দুলে সাথে বসুমতী,
তাহার ফণার দিন-মণি আজ কোন গ্রহে দেবে জ্যোতি !

জাগিয়া প্রভাতে হেরিনু আজিকে জগতে সুপ্রভাত,
শয়তানও আজ দেবতার নামে করিছে নন্দীপাঠ !
হে মহাপুরুষ, মহাবিদ্রোহী, হে ঋষি, সোহম-স্বামী !
তব ইঙ্গিতে দেখেছি সহসা সৃষ্টি গিয়াছে থামি,
থমকি গিয়াছে গতির বিশ্ব চন্দ্র-সূর্য-তারা,
নিয়ম ভুলেছে কঠোর নিয়তি, দৈব দিয়াছে সাড়া।

যখনি সৃষ্টা করিয়াছে ভুল, করেছ সঙ্স্কার,
তোমারি অগ্রে সৃষ্টা তোমারে করেছে নমস্কার !
ভৃগুর মতন যখনি দেখেছ অচেতন নারায়ণ,
পদাঘাতে তাঁর এনেছ চেতনা, কেঁপেছে-জগজ্জন !
ভারত-ভাগ্য-বিধাতা বক্ষে তব পদ-চিন ধরি
ইকিছেন, ‘আমি এমন করিয়া সত্য স্বীকার করি !
জাগাতে সত্য এত ব্যাকুলতা এত অধিকার যার,
তাহার চেতন-সত্যে আমার নিযুত নমস্কার !’

আজ শুধু জাগে তব অপরূপ সৃষ্টি-কাহিনী মনে,
তুমি দেখা দিলে অমিয়-কণ্ঠ বাণীর কমল-বনে !

কখন তোমার বীণা ছেয়ে গেল সোনার পদু-দলে,
 হেরিনু সহসা ত্যাগের তপন তোমার ললাট-তলে !
 লক্ষ্মী দানিল সোনার পাপড়ি, বীণা দিল করে বাণী,
 শিব মাথালেন ত্যাগের বিভূতি কণ্ঠে গরল দানি,
 বিষ্ণু দিলেন ভাঙনের গদা, যশোদ-দুলাল বাঁশি,
 দিলেন অমিত তেজ ভাস্কর, মৃগাক্ষ দিল হাসি ।
 চীর গৈরিক দিয়া আশিসিল ভারত-জননী কাঁদি,
 প্রতাপ-শিবাজি দানিল মস্ত্র, দিল উষ্মীষ বাঁধি ।
 বুদ্ধ দিলেন ভিক্ষাভাণ্ড, নিমাই দিলেন খুলি,
 দেবতারা দিল মন্দার-মালা, মানব মাখাল ধূলি ।
 নিখিল-চিন্ত-রঞ্জন তুমি উদিলে নিখিল ছানি—
 মহাবীর, কবি, বিদ্রোহী, ত্যাগী, প্রেমিক, কর্মী, জ্ঞানী !
 হিমালয় হতে বিপুল বিরাট, উদার আকাশ হতে,
 বাধা-কুঞ্জর তৃণ-সম ভেসে গেল তব প্রাণ-স্রোতে !

ছন্দ-গানের অতীত হে ঋষি, জীবনে পারিনি তাই
 বন্দিতে তোমা আজ আনিয়াছি চিন্ত-চিতার ছাই !
 বিভূতি-তিলক । কৈলাস হতে ফিরেছ গরল পিয়া,
 এনেছি অর্ঘ্য শূশানের কবি ভসু-বিভূতি নিয়া !
 নাও অঞ্জলি, অঞ্জলি নাও, আজ আনিয়াছি গীতি,—
 সারা জীবনের না-কওয়া-কথার ত্রন্দন-নীরে তিতি !
 এত ভালো মোরে বেসেছিলে তুমি, দাওনিষে অবসর
 আমারেও ভালোবাসিবার, আজ তাই কাঁদে অন্তর !

আজিকে নিখিল-বেদনার কাছে মোর ব্যথা কতটুকু,
 ভাবিয়া ভাবিয়া সাম্বনা খুঁজি, তবু হা হা করে বুক !
 আজ ভারতের ইন্দ্র-পতন, বিশ্বের দুর্দিন,
 পাষণ্ড বাংলা পড়ে এককোণে স্তব্ধ অশ্রুহীন ।
 তারি মাঝে হিয়া থাকিয়া থাকিয়া গুমরি গুমরি ওঠে,
 বক্ষের বাণী চক্ষের জলে ধুয়ে যায়, নাহি ফোটে !
 দীনের বন্ধু, দেশের বন্ধু, মানব-বন্ধু তুমি,
 চেয়ে দেখো আজ লুটায় বিশ্ব তোমার চরণ চুমি ।
 গগনে তেমনি ঘনায়েছে মেঘ, তেমনি ঝরিছে বারি,
 বাদলে ভিজিয়া শত স্মৃতি তবে হয়ে আসে ঘন ভারি ।

পয়গম্বর ও অবতার-যুগে জন্মিনি মোরা কেহ,
 দেখিনিকো মোরা তাঁদের, দেখিনি দেবের জ্যোতির্দেহ।
 কিন্তু যখন বসিতে পেয়েছি তোমার চরণ-তলে,
 না জানিতে কিছু না বুঝিতে কিছু নয়ন ভরেছে জলে।
 সারা প্রাণ যেন অঞ্জলি হয়ে ও-পায়ে পড়েছে লুটি,
 সকল গর্ব উঠেছে মধুর প্রণাম হইয়া ফুটি।
 বুদ্ধের ত্যাগ শুনেছি মহান, দেখিনিকো চোখে তাহে,
 নাহি আফসোস, দেখেছি আমরা ত্যাগের শাহানশাহে।
 নিমাই লইল সন্ন্যাস প্রেমে, দিইনিকো তাঁরে ভেট,
 দেখিয়াছি মোরা 'রাজা-সন্ন্যাসী' প্রেমের জগৎ-শেঠ !

শুনি, পরার্থে প্রাণ দিয়া দিল অস্থি বনের ঋষি ;
 হিমালয় জানে, দেখেছি দধীচি গৃহে বসে দিবানিশি !
 হে নবযুগের হরিশ্চন্দ্র ! সাড়া দাও, সাড়া দাও !
 কাঁদেছে শ্মশানে সুত-কোলে সতী, রাজর্ষি ফিরে চাও !
 রাজকুলমান পুত্র-পত্নী সকল বিসর্জিয়া
 চণ্ডাল বেশে ভারত-শ্মশানে ছিলে একা আগুলিয়া !
 এস সন্ন্যাসী, এস সম্রাট, আজি সে শ্মশান-মাঝে,
 ঐ শোনো তব পুণ্য জীবন-শিশুর কাঁদন বাজে !

দাতাকর্ণের সম নিজ সুতে কারাগার-যূপে ফেলে
 ত্যাগের করাতে কাটিয়াছ বীর বারেবারে অবহেলে !
 ইবরাহিমের মতো বাচ্চার গলে খঞ্জর দিয়া
 কোরবানি দিলে সত্যের নামে, হে মানব নবি-হিয়া !
 ফেরেশতা সব করিছে সালাম, দেবতা নোয়ায় মাথা,
 ভগবান-বুকে মানবের তরে শ্রেষ্ঠ আসন পাতা !

প্রজা-রঞ্জন রাম-রাজা দিল সীতারে বিসর্জন,
 তাঁরও হয়েছিল যজ্ঞে স্বর্ণ-জানকীর প্রয়োজন ;
 তব ভাগুর-লক্ষ্মীরে রাজা নিজ হাতে দিলে তুলি
 ক্ষুধা-তৃষাতুর মানবের মুখে, নিজে নিলে পথ-ধুলি
 হেম-লক্ষ্মীর তোমারও জীবন-যাগে ছিল প্রয়োজন,
 পুড়িলে যজ্ঞে, তবু নিলে নাকো দিলে যা বিসর্জন !
 তপোবলে তুমি অর্জিলে তেজ বিশ্বামিত্র-সম,
 সারা বিশ্বের ব্রাহ্মণ তাই বন্দিছে নমো নমো !

হে যুগ-ভীষ্ম ! নিন্দার শরশয্যায় তুমি শুয়ে
 বিশ্বের তরে অমৃত-মস্ত্র বীর-বাণী গেলে থুয়ে !
 তোমার জীবনে বলে গেলে—ওগো কঙ্কি আসার আগে
 অকল্যাণের কুরুক্ষেত্রে আজো মাঝে মাঝে জাগে
 চির-সত্যের পাঞ্চজন্য, কৃষ্ণের মহাগীতা,
 যুগে যুগে কুরু-মেদ-ধূমে জ্বলে অত্যাচারের চিতা !
 তুমি নব ব্যাস, গেলে নবযুগ-জীবন-ভারত রচি,
 তুমিই দেখালে—ইন্দ্রেরই তরে পারিজাত-মালা শচী !
 আসিলে সহসা অত্যাচারীর প্রাসাদ-স্তুম্ভ টুটি
 নব-নৃসিংহ-অবতার তুমি, পড়িল বক্ষে লুটি
 আত-মানব-হৃদি-প্রহ্লাদ, পাগল মুক্তি-প্রেমে !
 তুমি এসেছিলে জীবন-গঙ্গা তৃষাতুর তরে নেমে !
 দেবতারাই তাই স্তম্ভিত হেরো দাঁড়িয়ে গগন-তলে,
 নিমাই তোমারে ধরিয়াছে বুকে, বুদ্ধ নিয়াছে কোলে !

তোমারে দেখিয়া কাহারো হৃদয়ে জাগেনিকো সন্দেহ
 হিন্দু কিংবা মুসলিম তুমি অথবা অন্য কেহ।
 তুমি আর্তের, তুমি বেদনার, ছিলে সকলের তুমি,
 সবারে যেমন আলো দেয় রবি, ফুল দেয় সবে ভূমি !
 হিন্দুর ছিলে আকবর, মুসলিমের আরংজিব,
 যেখানে দেখেছ জীবের বেদনা, সেখানে দেখেছ শিব !
 নিন্দা-গ্লানির পঙ্ক মাখিয়া, পাগল, মিলন-হেতু
 হিন্দু-মুসলমানের পরানে তুমিই বাঁধিলে সেতু !
 জানি না আজিকে কি অর্ঘ্য দেবে হিন্দু-মুসলমান,
 ঈর্ষা-পঙ্কে পঙ্কজ হয়ে ফুটুক এদের প্রাণ !

হে অক্রিদম, মৃত্যুর তীরে করেছ শত্রু জয়,
 প্রেমিক ! তোমার মৃত্যু-শ্মশান আজিকে মিত্রময় !
 তাই দেখি, যারা জীবনে তোমায় দিল কষ্টক-হুল,
 আজ তাহারাই এনেছে অর্ঘ্য নয়ন-পাতার ফুল !
 কি যে ছিলে তুমি, জানি নাকো কেহ, দেবতা কি আউলিয়া,
 শুধু এই জানি, হেরি আর কারে ভরেনি এমন হিয়া !

আজি দিকে দিকে বিপ্লব-অহিদল খুঁজে ফেরে ডেরা,
 তুমি ছিলে এই নাগ-শিশুদের ফণি-মনসার বেড়া !

তুমিই রাজার ঐরাবতের পদতল হতে তুলে
 বিষু-শ্রীকর-অরবিন্দরে আবার শ্রীকরে থুলে !
 তুমি দেখেছিলে ফাঁসির গোপীতে বাঁশির গোপীমোহন
 রক্ত-যমুনা-কূলে রচে গেলে প্রেমের বৃন্দাবন !
 তোমার ভগ্ন চাকায় জড়ায়ে চালায়েছে এরা রথ,
 আপন মাথার মানিক জ্বালায়ে দেখায়েছে রাতে পথ !
 আজ পথ-হারা আশ্রয়হীন তাহারা যে মরে ঘুরে,
 গুহা-মুখে বসি ডাকিছে সাপুড়ে মারণ-মন্ত্র সুরে !

যেদিকে তাকাই কূল-নাহি পাই, অকূল হতাশ্বাস,
 কোন শাপে ধরা স্বরাজ-রথের চক্র করিল গ্রাস ?
 যুদ্ধিষ্ঠিরের সম্মুখে রণে পড়িল সব্যসাচী,
 ঐ হেরো, দূরে কৌরব-সেনা উল্লাসে ওঠে নাচি ।
 হিমালয় চিরে আগ্নেয়-যান চিৎকার করি ছুটে,
 শত ব্রন্দন-গঙ্গা যেন গো পড়িছে পিছনে টুটে !
 স্তব্ধ-বেদনা গিরিরাজ ভয়ে জ্বলদে লুকাই কায়—
 নিখিল-অশ্রু-সাগর বুঝি-বা তাহারে ডুবাতে চায় !
 টুটিয়াছে আজ গর্ব তাহার, লাজে নত উচু শির,
 ছাপি হিমাদ্রি উঠিছে প্রণাম সমগ্র পৃথিবীর !
 ধূজটি-জটা-বাহিনী গঙ্গা কাঁদিয়া কাঁদিয়া চলে,
 তারি নিচে চিতা—যেন গো শিবের ললাটে অগ্নি জ্বলে !

মৃত্যু আজিকে হইল অমর পরশি তোমার প্রাণ,
 কালো মুখ তার হলো আলোময়, শূশানে উঠিছে গান ।
 অগুরু-পুষ্প-চন্দন পুড়ে হলো সুগন্ধতর,
 হলো শুচিতর অগ্নি আজিকে, শব হলো সুন্দর !
 ধন্য হইল ভাগীরথী-ধারা তব চিতা-ছাই, মাখি,
 সমিধ হইল পবিত্র আজি কোলে তব দেহ রাখি ।

অসুর-নাশিনী জগন্মাতার অকাল উদ্বোধনে
 আঁখি উপাড়িতে গেছিলেন রাম, আজিকে পড়িছে মনে,
 রাজর্ষি ! আজি জীবন উপাড়ি দিলে অঞ্জলি তুমি,
 দনুজ-দলনী জাগে কিনা—আছে চাহিয়া ভারত-ভূমি !

রাজ-ভিখারি

কোন ঘর-ছাড়া বিবাকীর বাঁশি শুনে উঠেছিলে জাগি,
ওগো চির-বৈরাগী !
দাঁড়ালে ধূলায় তবে কাঞ্চন-কমল-কানন ত্যাগি—
ওগো-চির-বৈরাগী !

ছিলে ঘুম-ঘোরে রাজার দুলাল,
জানিতে না কে সে পথের কাঙাল
ফেরে পথে পথে ক্ষুধাতুর-সাথে ক্ষুধার অন্ন মাগি,
তুমি সুধার দেবতা ‘ক্ষুধা’ ‘ক্ষুধা’ বলে কাঁদিয়া উঠিলে জাগি—
ওগো-চির-বৈরাগী !

আঙিয়া তোমার নিলে বেদনার গৈরিক-রঙে রেঙে,
মোহ-ঘুমপুরী উঠিল শিহরি চমকিয়া ঘুম ভেঙে !
জাগিয়া প্রভাতে হেরে পুরবাসী
রাজা দ্বারে দ্বারে ফেরে উপবাসী,
সোনার অঙ্গ পথের ধূলায় বেদনার দাগে দাগী !
কে গো নারায়ণ, নবরূপে এলে নিখিল-বেদনা-ভাগী—
ওগো-চির-বৈরাগী !

‘দেহি ভবতি ভিক্ষাম্’ বলি দাঁড়ালে রাজ-ভিখারি,
খুলিল না দ্বার, পেলো না ভিক্ষা, দ্বারে দ্বারে ভয় দ্বারী !
বলিলে, ‘দেবে না ? লহ তরে দান
ভিক্ষাপূর্ণ আমার এ প্রাণ !’—
দিল না ভিক্ষা, নিল নাকো দান, ফিরিয়া চলিলে যোগী !
যে-জীবন কেহ লইল না তাহা মৃত্যু লইল মাগি ॥